

DESSEIN

TOUCHANT LA RECERCHE

DES PLANTES

DU PAYS DE LANGUEDOC;

DESDIÉ A MESSIEURS,

MESSIEURS

LES GENS DES TROIS ESTATZ

DUDIT PAYS.



A MONTPELLIER.

Par JEAN GILLET.

M. DCV.



DESSEIN

TOUCHANT LA RECHERCHE

DES PLANTES

DU PAYS DE LANGUEDOC;

DESDIÉ A MESSIEURS

LES GENS DES TROIS ESTATZ

DUDIT PAYS.

COMME ainsi soit (Messieurs) que par l'entremise de la santé le bon jugement se fasse valoir & les fourvoyemens d'esprit soyent empeschez, il me semble que l'antiquité lui faisoit tort de la placer parmy les fievres, jaunisses & autres semblables encombres à qui elle dressoit des autels, attendu que sa réputation mérite quelque chose de plus & n'a besoin d'abuser de ceste folle croyance pour maintenir son honneur: car ceste plus que précieuse perle ne se met en crédit que par soi-mesme, elle attire chascun par sa naïve douceur, à raison de sa valeur: il n'y a rien qui soit de plus haut pris, sa présence donne du contentement, & sa perte

beaucoup plus de regret. Tout autre bien s'il n'est
 confit en cette douceur demeure sans saveur, &
 ordinairement sans fruit. Qui ne sçait que la raison
 mesme est troublée en la jouissance de son sceptre
 par l'effort & violence des maladies ? & de quoy
 servent les vertus durant les eclipses de ceste
 lumiere ? Quant aux biens de dehors & autres du
 corps, c'est peu de cas au pris de la santé : ostez
 la d'icy bas, c'est fait de toute lieffe. C'est un
 alme soleil qui met tout en vigueur, un contrepoids
 qui remue toutes les piéces & charges, tant pu-
 bliques, que particulieres de l'assemblée des
 hommes, de façon que si elle retiroit à coup &
 de toutes parts son influence, tout ce qu'il y a
 parmy nous de bon & de beau & d'agréable
 s'anéantiroit : toutesfois il n'y a rien de plus fresse
 & subject à d'avantage d'inconveniens que la
 santé, & semble de jour en jour son estat empirer
 à mesure que le monde vieillit. Et partant on ne
 se doit esmerveiller de quoy la Médecine, en la
 protection de qui elle est, a esté de tout temps en
 honneur, & maniée par les Princes & Roys, &
 a devancé parmi toutes autres sciences, & si
 tous desirent se mesler de cest art, attendu que
 personne ne s'en peut passer, d'où s'est ensuyvi
 que les provinces fertiles & heureuses en remedes,
 comme l'Egypte au dire d'Homere, l'Italie au

rapport d'Æschyle , & la Candie selon que nous apprend Dioscoride , ont esté en grand vogue & l'ordinaire abord des estrangers : mais plustost nous devons premierement louer ceste confédération faicte par tous les humains sous l'autorité de nature, pour la tuition de la santé & establisement de la Médecine. En après nous esvertuer d'enrichir de plus en plus les magasins de ses arsenatz , y aportant chascun ce qui est de son creu : en troisieme lieu préférer tousjours les remedes aisez à recouvrer , aux difficiles à avoir : & en quatrieme reconnoître en nous un deffaut vraiment françois , qui est de priser ce qui vient de dehors , & mespriser ce qui croist chez nous. Quelques-uns font grand estat de l'Austriche , Hongrie , Italie & Espagne , pour le faict des plantes : mais j'asseure hardiment que notre Languedoc les surpasse , soit pour le nombre des sortes , soit pour l'abondance & vertu de ce qui y croist. Je veux prendre droict par le narré qui se faict des plantes de ces autres provinces. Qui trouvons-nous qui ne soit chez nous & meilleur , & à quoi nous n'ayons moyen de faire notable addition ? Je ne fais que suivre le dire des estrangers mesme qui ont voyagé par cette province en nous taxant d'une incroyable nonchalance à faire valoir ce que nature nous livre si franchement , ils reconnoissent que ça été par une signalée divine pourvoyance ,

que la plus fameuse escolle de Medecine qui fut onques a esté eslevée en la plus médicamenteuse province de l'univers, de façon que ce qu'on dit ordinairement que le Turc descendu en nos plages court en nos montagnes, plus pour y cueillir de nos herbes & plantes, que pour faire autre capture & butin : il a autant de vray semblable du costé du lieu, comme il y en a peu du costé de la turquesque avarice. La fertilité de nostre terroir & heureuse temperie de nostre air, se faiët assez cognoistre par la qualité & quantité de noz bleds, vins, pastel, olives, sel & autres fruiëts, & commoditez qu'on vient querir chez nous : mais le divers naturel des plantes requerant différent terroir : & cela estant cause de la defectuosité qui se trouve ailleurs, nous pouvons dire que comme ceste contrée surpasse toutes nos voisines en affluence de fortes de plantes, aussi que la cause en est du tout évidente : car quelle différence de terroir, n'y peut on remarquer ? Nous avons des montagnes, collines, plaines, vallons, forestz, bocages, landes, terres arrables de toutes façons, jardins, prairies, & pasturages : fontaines, ruisseaux, rivières & mer : lieux gras, maigres, chauds, froids, secs & humides : bref ceste belle & longue estendue du costé martitime. Nous n'avons faute sinon de diligence à faire recherche de ce que nature y

estalle. Messieurs, le florissant état de ceste province qui de si long tems est en possession d'emporter le pris de bien cultiver & traicter la Médecine : la naturelle générosité de vos cœurs à entretenir & eslever l'honneur & le bien du pays, lequel souz le bonheur & conduite d'un si brave Roy que Dieu nous a donné, doit plustot redoubler que prendre relasche : l'affection que je porte à la splendeur de ce Gouvernement où je suis honoré de la profession royale des Plantes & charge du Jardin, qui par autorité du Roy & par la faveur de Monseigneur le Connestable, Monseigneur le Duc de Ventadour & votre ayde j'y ay dressé, m'ont faict avoir la volonté de vacquer ces années passées à ceste recherche, mes pénibles & continuels travaux n'ont esté à cest effect employez en vain. J'ay par ce moyen descouvert plusieurs belles & rares plantes qui n'ont encore esté cogneües ny escrites que je sache, & une infinité d'autres, voire de celles qui sont en singuliere recommandation, tant à cause de leurs divines & rares vertus, que pour la beauté de leurs fleurs, lesquelles on n'a jamais estimé prendre naissance en nos montagnes, qui est cause que les ayant veu ailleurs, & en voulant peupler une partie du Jardin Royal & Médical de Languedoc dressé à Montpellier, ignorant pour lors qu'elles prissent leur estre en

ceste province , j'ay esté contraint les faire apporter de Paris & autres lieux plus esloignez avec grands frais & despens. Je m'asseure que si je continue cette recherche , je decouvriray encor plusieurs autres belles plantes , la figure & briefve histoire desquelles , & de toutes les autres qui se trouvent en Languedoc , avec une facile demonstration du lieu où elles croissent : j'espere dans quelques années mettre en lumiere sous vostre autorité le tiltre de l'herbier général du pays de Languedoc si je suis secouru.

Ceste recherche (Messieurs) avec l'impression dudit herbier , orné & enrichy des pourtraicts & figures des herbes gravées & représentées de mesme que sont celles que je vous ay bien voulu faire veoir sur la fin de ce petit discours, ne peut recevoir sa derniere & desirée perfection sans vostre assistance , vous protestant que si j'avois moyen de parachever une si haute entreprise sans implorer l'ayde publique , que je ne m'adresserois si souvent à une si celebre assemblée que l'œuvre ne fust entierement parfait. Mais quoy ? l'excessive despense que j'ay faiët & continue journellement de faire , tant à la susdite recherche qu'aux grands bastiments qu'il a été nécessaire de faire audit Jardin , ont tellement espuisé mes moyeus , qu'ils m'ont contraint de vendre mon paternel , &

m'engager de tous costez : de sorte qu'il ne me reste pour tout héritage qu'une populeuse famille sans moyen de l'eslever , & qui seroit contrainte de mandier sa vie au cas que je l'abandonnasse par mort , ce qui est presque advenu par plusieurs fois depuis le temps que j'ay entrepris ceste penible recherche. Je ne pense pas (Messieurs) qu'avez autre volonté pour le présent , que celle qu'aviez aux penultiesmes Estatx tenus à Pezenas , dans l'assemblée desquels j'eus l'honneur d'entrer & de vous proposer mon dessein & la despence qu'il convenoit faire à la poursuite d'iceluy. Vous m'exhortates à ceste dite poursuite , & promistes secours & ayde , laquelle j'implore maintenant ; ne foyez cause (Messieurs) qu'un œuvre qui vous est tant honorable & profitable à tous ne se puisse esclorre & loger dans peu de temps dans voz cabinets , & se faire cognoître aux estrangers qui vous en sçauront gré , & seront par ce moyen attirés à visiter vostre Province , en laquelle ils verront sur le lieu les plantes qui leur auront esté représentées par leurs pourtraicts & figures , se transportant aux montagnes & lieux de leur naissance comme quelqu'uns d'iceux ont déjà commencé de faire ces années passées , & y ont demeuré avec moy près de deux mois , ce qui a esté fait sans despences , laquelle est revenue au profit

des hostes de la ville de Merüés , de l'Esperon & autres lieux circonvoisins , où nous nous retirions pour coucher & recouvrer des vivres.

Recevez doncques , s'il vous plaist , à ceste condition mes travaux , lesquels avec toute humilité je vous ai voué , consacré & desdié , comme

Vostre humble serviteur **RICHER DE BELLEVAL**,
Médecin du Roy & Professeur Anatomique &
Botanique en son Université de Médecine de
Montpellier.

GRAME N°SVPINVM·MONSPELIENSE·





MOLY SYBETINVM.




GLYCYRRHIZA·TRIFOLIA·
HORTI DEI·





Άλπιχοπυραμιδῶδες





ALSINE ALPINA
ἙΛΕΙΟΣ

